



Uunga
Inatsisartuni Ilaasortaq
Mariane Paviasen
Inuit Ataqtigiit

15-09-2022
Suliap normua 2022 - 17625
Akt. id. 21173101

Postboks 260
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

Akissuteqaat, § 37 naapertorlugu apeqquteqaammut nr. 174-2022-imut, ineqarnermut tapiissutit pillugit apeqqutigineqartunut.

Asasara Mariane Paviasen.

Apeqqutitit qujassutigaaakka. Apeqqutigisatit ataasiakkaarlugit uani ataani issuarneqartarput, akissummillu ilaneqartarlutik.

1. Ineqarnermut tapit qaqugu iluarsiiviginiarneqarpat?

Illoqtigiit ataatsimut isertitaasa allannguuteqarnerisa kingunerisinnaavaat ineqarnermut tapiissutit akilerneqartartut eqqortuujunnaarneri. Taamaasilluni pissusiulersut kingunerisaannik tapiissutit aningaasartaat qummut iluarsiivigisariaqarsinnaapput akissarsiat isertinneqartartut appariaateqarsimappata, imaluunniit imaassinnaalluni ineqarnermut tapiissutit akilerneqartartut apparneqartariaqarsinnaallutik inoqtigiit illoqtigiittut ataatsimut isertitaat annertunerulersimappata.

Inoqtigiit illoqtigiittut amerlassusaat aamma allannguuteqarsinnaavoq taakkua ikinnerulersimappata, akissarsiorluni sulinikkut isertitaqartarnermiit soraarnerussutisiaqarnermut assigisaanulluunniit ikaarsaartoqarsimappat, imaluunniit toqkkut qimaguttoqarsimappat, ilinniakkamik sivisunerusumik aallartitsisoqarsimappat imaluunniit appariinnik avittoqarsimappat.

Pissutsini siuliani eqqartorneqartuni pingaaruteqartunik allannguuteqartoqarsimappat, ineqarnermut tapiissutit aningaasartaasa annertussusii naatsorsorneqaqqittussaapput pissutsit atuuttuulersut aallaavigalugit, Inissiani attartortittakkani ineqarnermut tapiissutit pillugit Inatsisartut inatsisaanni § 5, imm. 2 naapertorlugu. Tamanna atuuppoq apeqqutaatinnagu allannguutaasut inoqtigiit isertitaasa appariarsimanerannik imaluunniit annertuseriarsimanerannik tunngaveqarsimanersoq.

Naatsorsuisoqaqqissaq ukiumoortunik isertinneqartussatut naatsorsuinermi tunngaviusut aallaavigineqartut atorunnaarsimappata imaluunniit annertuutigit allannguuteqarsimappata, taamaasillunilu aningaasaqarnikkut atugassarititaasut pissutsit annertuumik allannguuteqarsimappata.



Nutaamik naatsorsuisoqarnissaanut atorneqartussatut pigineqassapput pappialat uppernarsaataasut inuit pineqartut aningaasaqarneranni allannguutaasunut atasut, ineqarnermut tapisianik naatsorsueqqinnissami atorneqartussat.

Ineqarnermut tapiissutinik naatsorsueqqinnermi allannguutinik pingaaruteqartunik tunngaveqartumi tunngavigineqassapput isertinneqartussatut naatsorsuutigineqartut tamarmiusut, suliarineqassallutillu ukiumut ineqarnermut tapiissutinik akiliuteqarfiussap ukiup sinneranut atuuttussamik. Inissiani attartortittakkani ineqarnermut tapiissutit pillugit Inatsisartut inatsisaanni § 6, imm. 2 naapertorlugu ineqarnermut tapiissutinik pisartagaqartut pisussaapput kommunimut nalunaaruteqarnissamut, allannguutaasinnaasut ineqarnermut tapiissutinik pisartagaqartarnermut tunngaviusuni naatsorsuutigineqartut pillugit.

2. Ineqarnermut tapit tamakkiisumik iluarsiviginiarneqarpat?

Akissuteqarninni tunngavigissavara apeqqutigineqartumi aallaavigineqartoq isiginiaasoq inissiani attartortittakkani ineqarnermut tapiissutinut Inatsisartut inatsisaata allanngortissamaarneqarnera.

Naalakkersuisut naatsorsuutigaat pisariaqalissasoq ineqarnermut tapiissutit pillugit Inatsisartut inatsisaata allanngortinneqarnissaa pillugu inatsisissamut siunnersuusiornissaq, ineqarnermut suliaasaqarfimmut pilersaarutaasunik tamarmiusunik suliaqarnermut atatillugu. Ineqarnermut atatillugu suliaasaqarfimmi ataatsimoortumik pilersaarusiassami naatsorsuutigineqarpoq pisariaqassasoq ineqarnermut tapiissuteqartarnermut atatillugu malittarisassanik naleqqussaanaissaq pisariaqalerumaartoq, ineqarnermut atatillugu aningaasartuutunut siunissami unammilligassaaalerumaartut iliuseqarfigisinnaajumallugit, minnerunngitsumik innuttaasunut annikinnerpaanik inuuniarnikkut atugassaqartortagut eqqarsaatigalugit.

Piffissami matumani ajornarallarpoq ersarinnerusumik pilersaarutitut piffissalersuineramik tunniussaqaartoqarsinnaanera.

a) Imaluunniit utoqqarnut tunngasumik immikkut ineqarnermut tapinik pilersitsisoqarniarpa?

Naalakkersuisut naatsorsuutigaat saqqummiussaqaarsinnaajumaarlutik inissiani attartortittakkani ineqarnermut tapiissutit pillugit Inatsisartut inatsisaannut allannguutissamik saqqummiussisinnaajumaarlutik, immikkut isiginiarlugit utoqqalinersiaqartut, tamatumani utoqqalinersiaqartut aammalu siusinnaartumik pensionisiaqartut eqqarsaatigalugit. Siunnersuut nunatsinni siusinaartumik pensionisiaqartut aamma utoqqalinersiaqartut atugaannik pitsanngorsaanerup ingerlateqqinnerissavaa. Siunnersuut ineqarnermut tapiissutinik ilanngaassisarnermut utoqqalinersiaqartut ilaasa misigisaannut utoqqalinersiutit aningaasartaannik qaffaanerup kingunerisaanik pisumut iluarsiissutaassaaq.

Naatsorsuutigineqarpoq siunnersuut UPA2023-imi saqqummiunneqarumaartoq.

3. Ineqarnermut tapit allanngortinneqarnissaat aningaasatigut qanoq naleqarsinnaanersoq Naalakkersuisunit ilisimaneqarpa?

Inissiani attartortittakkani ineqarnermut tapiissutit allanngortinneqarnissaat pillugu siunnersuut immikkut pensionisiaqartunik isiginiaasoq naatsorsuutigineqartorlu UPA2023-imi saqqummiunneqartussatut maanna



piareersarlugu suliarineqarpoq, tasanilu ilaalluni aningaasatigut qanoq kinguneqarnissaa pillugu qulaajaaneq. Taamaattumillu piffissami matumani eqqoqqissaartunik missingersuutunik saqqummiussisoqarsinnaanngilaq, kisanili pisortanut aningaasatigut kingunerisassai oqimaaqatigiittussatut naatsorsuutigineqarput, sanilliuussigaanni akuersissutigineqarsimasunut pensionisiat aningaasartaannik qaffaasimanernut UKA2021-imi (imm. 25). Sipaaruteqarsimaneq pisimasoq isertitaqarnerulernerup kingunerisaanik ilanngaasiisarsimanikkut, siunnersuutaajumaartumi oqimaaqatigiissitsiviusaaq, taamaasillunilu ineqarnermut tapiissutinut aningaasartuutit pensionisianik qaffaaneq sioqqullugu pissutsit atuuttut assigikannissallugu.

Inissiani attartortittakkani ineqarnermut tapiissutit pillugit Inatsisartut inatsisaannik allannguuteqartitsinissamik naatsorsuutigisaasunut sanilliullugu, Naalakkersuisut ineqarnermut atatillugu pilersaarutaat ataatsimoortut naapertorlugit aningaasaqarnikkut tamatumani kingunerisassani apeqqutaassapput atugassarititaasut qanoq ittut atortuulersinneqarnissaannik qanoq kissaateqartoqarnera. Aningaasaqarnikkut kingunerisassaannut tunngatillugu pissutsit amerlasuut apeqqutaassapput, assersuutugalugu atuuffissaa, tapiissutit annertunerpaaffissaat, isertitanik tunngavilimmik annertussusiliisarneq aamma ineqarnermut akiliutit qanoq annertussuseqarneri.

Taamaattumik Naalakkersuisut piffissami matumani nalilersinnaanngikkallarpat aningaasaqarnikkut kingunerisassat naatsorsuutigineqartutut inissiani attartortittakkani ineqarnermut tapiissuteqarnermut atatillugu atortuulerumaartut.

Inussiarnersumik inuulluaqqusillunga

Jess Svane